

皇宋十朝綱要

卷第十三

眉山李壘編

哲宗

庚午元祐五年

遼主洪基大安六年

正月丁丑湖南路言邵州閱峽城峒蠻楊晟進等降 殿中侍御史賈易上疏論韓琦定策之功元豐王同老之言文彥博所奏前後抵牾不可信者六庚寅太皇太后出易疏示三省宣諭韓琦定策之功甚詳仁宗朝無敢言此事者惟韓琦一人言之 詔鄜延路經略使趙鼎分畫地界於二十里相照接速取直爲界卓立封堠其堡鋪于界堠內修建毋得立於兩不耕地

二月辛丑以旱罷修河悉散遣役夫 癸卯罷浚京城濠築蘭州質孤勝如兩堡 庚戌文彥博致仕

三月丁卯出元豐庫封樁錢二十萬賜都水監和雇修河人夫

綱要十二
四月癸丑詔自今講讀官經筵退留二人奏對邇英閣 丁巳以旱避殿減膳罷五月朔日文德視朝 詔中書舍人王巖叟樞密承旨韓川左諫議大夫劉安世看詳役法事有未備者

五月乙亥自去年冬無雪至是始雨 壬午詔禮官議方澤祀典先是以知亳州鄧溫伯爲翰林承旨中書舍人王巖叟給事中鄭穆相繼封還詔命御史中丞梁燾亦上疏論列不聽巖叟以言不用請去侍御史孫升乞早罷溫伯尋改溫伯侍讀提舉醴泉觀巖叟又封還之燾及安世朱光庭爭論尤力詔溫伯知南京已而復申承旨之命安世光庭又累疏申執 壬辰巖叟徙爲都承旨庚寅燾權戶部尙書安世爲中書舍人朱光庭給事中燾安世光庭皆力辭不數月燾光庭竟補郡安世提舉崇福宮 六月乙卯御史中丞蘇轍上疏乞謹守初政久而彌堅擇用近臣無雜邪正時宰相呂大防與中書侍郎劉摯欲引用元豐舊人以平舊怨謂之調停太皇太后頗惑之轍退復上疏

力陳其不可太皇太后命宰執於簾前讀其疏仍宣諭蘇轍言極有理宰執從而和之自此兼用邪正之說始衰 辛酉夏人犯質孤勝如堡

七月夏主乾順乞保安軍依綏州例打量二十里於內十里築堡鋪耕牧於外十里立封堠空作草地詔答以既欲于漢界留出草地即於蕃界亦當依數對留

九月復置集賢院學士

十月癸巳罷修河司 詔導洛水入汴 乙未許夏國於蕃界內存留五里空爲草地漢界亦依此對留爲兩不耕地丁巳中書侍郎傅堯俞言邊臣犯罪當歸中書取旨不當專在密院遂與知院韓忠彥更相爭執論奏中丞蘇轍劾奏之堯俞忠彥各引罪求罷

十一月戊辰湖北路奏渠陽蠻囚楊晟秀請降

十二月丙午復渠陽寨爲誠州補溪峒舊族楊光偕之子昌達爲刺史 高麗王熙改名顒是歲復遣使入貢

辛未元祐六年

遼主洪基大安七年

正月癸酉詔自今祠祭母用羔羊

二月辛卯門下侍郎劉摯拜右僕射兼中書侍郎

四月辛卯罷賞花釣魚宴 乙未復置開寶通禮科 辛亥

詔自今臣僚家不許陳乞祖若父碑額 是月夏人犯鄜延

熙河路殺虜人民毀烽火臺兩路出兵要其歸路禽其首領

二人

五月己未朔日食 己巳阿里骨遣溫溪心入貢 開封府

都省吏任永壽獄具論決從徒刑編管千里 庚辰詔以娶

宗室女得官者毋得過朝請大夫若皇城使

六月夏人數萬寇定西城及通渭寨攻毀並邊崖巉殺守巉

人甚衆又寇涇原大掠開遠堡得勝等寨而去 壬寅詔今

後入三伏令內侍傳宣三衙權免諸軍班教閱 甲辰國史

院置修撰官二員以翰林學士趙彥若給事中范祖禹爲之

兩浙西路大水杭州死者五十萬蘇州三十萬詔遣吏部

郎中岑象求爲本路轉運副使仍賜米百萬斛錢二十萬令

象求賑給之

七月乙丑復置解鹽制置使

八月夏人寇懷安寨監押李遜力戰拒之 癸巳詔以京西

路封椿錢二十萬緡充應奉陵寢支費 辛亥詔復修邇英

閣記注

閏八月壬申夏人十五萬寇河東路圍麟州及神木等寨

九月丁酉詔自今內庫歲出錢五十萬緡以備邊費 壬子

以上清儲祥宮成降德音於天下

十月庚午幸國子監謁文宣王武成王廟 庚辰令諸宮院

建小學

十一月甲申高麗遣使黃宗懋來獻黃帝鍼經 乙酉劉摯

罷爲觀文殿大學士知鄆州 壬辰作元祐觀天曆 壬寅

遣戶部郎中穆衍爲陝西轉運使往涇原秦鳳熙河路判官

張景先往鄜延環慶路按實邊備

十二月壬申遣太府卿劉忱體量麟府路 壬子客星出參

壬申元祐七年

遼主洪基大安八年

正月壬子尙書省言諸路參行差役雇役之法令諸路轉運

提刑司遍下州縣悉心依法推行究詳法意均當無擾

二月丁卯詔陝西沿邊乘時進築城寨仍毋得輕易深入
簽書樞密院事王巖叟與呂大防議進築汝遮寄堡 是月
環慶路經略使章惇遣將折可適入虜界焚蕩族帳斬獲酋
領以歸

三月辛丑詔侍從臺諫禮官集議南北郊祀典

四月己未立皇后孟氏 甲戌立諸路考察縣令課績法

五月甲申築定遠城 庚子罷侍從官轉對

六月癸丑詔停淮南東西兩浙路催理積欠一年 辛酉尙
書左丞蘇頌拜右僕射兼中書侍郎 立河東陝西諸路橫
鋒牽制法 甲子置廣文館解額 戊寅詔罷修北京護城
堤

七月癸巳復置翰林侍講學士以翰林學士范祖禹爲之

甲午環慶將折可適破夏人于尾丁崖

八月庚申詔河防春夫每年以十萬人爲額 癸亥太廟獲
設牙盤食 乙亥前陷交趾將吏蘇佐等十七人自拔歸朝

九月戊戌詔冬至南郊宜依故事設皇地示位俟禮畢別議方澤之儀以聞

十月辛酉河復東流賜都水使者吳安持章服是月夏人大舉寇環州本路經略使章粦遣將折可適邀擊之大敗而去

十一月癸巳祀天地于圜邱大赦

十二月甲子詔自今罷飲福燕始朝廷用熙河經略范育議將進築汝遮並納迷結珠龍川城中書侍郎范百祿獨以爲不可會明年春夏人請和議遂格

癸酉元祐八年

遼主洪基大安九年

正月丁亥上御邇英閣呂大防陳祖宗家法八事辛卯夏人款塞謝罪請和吳安持乞於北流作軟堰門下侍郎蘇轍以爲不可遂罷之

三月壬午右僕射蘇頌罷爲觀文殿大學士集禧觀使庚子詔將來御試詩賦舉人復試三題經義舉人且試策後仍全試三題

四月丁未朔夏人來謝罪願以蘭州易塞門寨不許 丁巳
詔自今南郊合祭天地永爲定式罷禮部某官詳議

五月辛卯御史董崇逸黃慶基坐論禮部尙書蘇軾尙書右
丞蘇轍並罷言職

七月丙子朔知穎昌府范純仁拜右僕射兼中書侍郎

九月戊寅太皇太后崩

十月丙申上始親政 庚午詔內侍劉援等十人爲入內供

奉官尋以內侍劉惟簡梁從政爲內侍省押班

十一月御史楊畏上疏乞講求法制成繼述之道上即召見
詢以先朝之臣可用者畏疏章惇安燾呂惠卿鄧溫伯李清
臣等姓名以進且乞召相章惇上納之

十二月降授通議大夫提舉洞霄宮章惇爲資政殿學士散
官呂惠卿除中大夫提舉崇福宮給事中吳安詩中書舍人
姚勔皆繳還詔命不聽

甲戌紹聖元年

遼主洪基大安十年

正月辛丑命中書舍人呂希純殿中侍御史井亮采使行河

罷河東大銅錢之禁

二月己酉葬宣仁聖烈皇后于永厚陵 戊辰詔禮官參考

褒崇皇太妃典禮 是月都水監始興工築梁村口

三月壬申朔日食 用呂希純等言詔增治北流堤岸閉內

黃決口鑿開九里堤東河亦疏口地開雞爪河助東流之水

罷宰執每旬赴經筵 乙亥左僕射呂大防罷爲觀文殿

大學士知穎昌府 丁丑詔今舉御試仍試策 丁酉賜禮

部進士畢漸以下及第初中書侍郎李清臣擬進策問即爲

邪說以惑羣聽及試士初考官悉取主元祐禮部侍郎楊畏

覆考悉反之於是國論遂變自是士大夫爭陳紹述而元祐

之人皆相繼得罪矣 蘇轍兩上疏論御試策題有復熙豐

故事之意上不悅責轍以漢武帝上比先帝引喻失當轍恐

趨下殿待罪上聲色甚厲范純仁獨進曰史稱武帝雄才大

略爲漢七制之主轍以此先帝非謗也陛下進退大臣當以

禮不宜如此急暴於是轍出知汝州

四月乙巳令戶部詳定役法之未就緒者 詔以都水使者

王宗望言修閉張色河門 壬子知定州蘇軾落職知英州

自是元祐諸人相繼黜責軾爲之首 癸丑用翰林學士曾

布言改元 甲寅詔王安石配享神宗廟庭 壬戌提舉洞

霄宮章惇拜左僕射兼門下侍郎右僕射范純仁罷爲觀文

殿大學士知穎昌府 丙寅罷五路諸科 丁卯詔諸路復

行元豐免役法 戊辰中書舍人蔡卞請重修神宗實錄

閏四月壬申復提舉常平官 癸酉罷十科 詔引見改官

人依元豐令每歲毋得過一百四十人 丙戌復置義倉

戊子詔在京諸司所受傳宣申批並候朝廷覆奏以行

五月壬寅罷修官制局 甲辰罷進士習賦令專治經術各

專大經一中經一願專二大經者聽 立宏詞科 己酉翰

林院學士曾布乞下王安石本家取索安石手書日錄付史

院參照重修神宗實錄 癸丑詔三省選吏胥編類元祐臣

僚章疏及朝廷更革事條

六月甲戌以御史中丞黃履等言詔知永興軍呂大防知青
州劉摯並落職大防知隨州摯黃州蘇轍降官知袁州蘇軾

散官安置惠州 甲申除進士引用王安石字說之禁 乙

酉以黃履等言詔知鄆州梁燾知成德軍劉安世直集賢院
吳安詩並落職燾知鄂州安世知南安軍安詩監光州酒稅

又詔知虢州韓川知應天府孫升並落職川知坊州升知

房州 丙戌右正議大夫蔡確追復觀文殿學士贈特進

丙戌詔前史官范祖禹趙彥若黃庭堅並宮觀住府界報應

史院文字

七月丁巳以黃履及御史周秩諫官張商英言追奪司馬光

呂公著贈諡及所賜神道碑額撤樓毀碑又追奪王巖叟贈

官貶呂大防劉摯蘇轍爲散官分司南京梁燾提舉舒州靈

仙觀劉安世主管玉隆觀並分貶諸州初章惇欲用蔡卞議

光及公著當發塚斲棺上不聽 詔內侍陳言編管白州

戊午詔曰朕繼體之初宣仁聖烈皇后權同聽政以簾帷之

間聞見不周故倚任耆艾冀昭聖功而一時大臣朋黨合計

悉取先皇帝之法紛更之朕爲人子但不得已也其司馬光

以下各以輕重議罰布告天下其餘一切不問 罷太廟牙

盤食 丙寅詔開封府界置孳生監 都水使者吳安持乞

開新河導洛水南行

八月壬午詔安持提舉開修新河 壬辰復水磨茶 丁酉

詔戶部鞫陽翟大姓蓋漸訴御史來之邵絕祀奪產獄

九月己酉詔三省樞密院檢例用熙豐元祐參較 庚戌罷

制科 罷廣惠倉 甲寅議棄渠陽官吏罪集賢殿修撰唐

義問等並黜爲散官

十月詔皇太妃坐龍鳳輿兼用紅黃繖出入由宣德正門宮

中並稱臣妾 辛巳都水使者王宗望言河悉已東還故道

北流斷絕 導洛新河成

十一月己亥朔復八路差官法 壬子蔡確追復觀文殿大

學士 癸丑命工部侍郎吳安持都水使者王宗望相視自

闕村直至海口增修新舊堤防 甲寅開封男子呂安坐醉

狂指斥乘輿當斬特貸之 提舉成都等路茶馬陸師關乞

許漢蕃容給券賣馬

十二月辛未增立銅錢出中國界法 甲午治修神宗實錄

史官詆誣罪范祖禹趙彥若黃庭堅並散官安置祖禹永州
彥若澧州庭堅黔州

乙亥紹聖二年

遼主洪基壽昌元年

二月辛巳出內庫錢帛二十萬助河北賑濟 甲午罷廣文

館解額

三月己未詔職事官並罷帶職 庚申詔以日曆還祕書省

命著作佐郎王任在省編修 辛酉詔文散官除光祿正議

中散朝議大夫分左右外餘並罷 己卯皇太妃宮以聖瑞

爲名

四月戊辰易集賢院學士爲集賢殿修撰直集賢院爲直祕

閣集賢校理爲祕閣校理 壬申封華原郡王宗愈爲嗣濮

王 丁亥置律學博士 壬辰復置河北糴使司

五月己酉詔蓋漸獄移送御史臺推治尋又移於大理寺

七月丙辰大理寺復置右治獄

八月庚午詔熙河等路罷分畫地界止所遣議疆界官 乙

亥詔熙河經略使范純粹乘機築汝遮寨 丙子詔大理寺

丞分左右推如左推翻異即送右推母與開封互勘並不許
地分探報 庚辰左司郎中張商英以交關蓋漸獄事責監
襄州酒稅 甲申詔呂大防等永不得敘復 乙酉復置三
省六房院

九月觀文殿大學士知穎昌范純仁坐五上奏乞令呂大防
等任便居住上批純仁立異邀名落職知隨州 辛亥大饗
明堂大赦 壬戌監察御史常安民坐論戶部尙書蔡京交
結中官大臣假紹述之名以報私怨送吏部與監當差遣
十一月乙丑復置監察御史三人分領六察不許言事又詔
奏舉臺諫官母限資序 乙酉詔三省給舍都司官編類元
祐臣僚章疏申請文字戊子詔密院亦如之

皇宋十朝綱要

卷第十四

眉山李璣編

哲宗

丙子紹聖三年

遼主洪基壽昌二年

正月庚戌詔鞠獄非本章指言而蔓求他罪者論如律
丁巳陳衍配朱崖軍 詔出內庫金帛六十五萬赴河東陝西
五路經略司封椿 戊午詔復罷合祭以大禮歲夏至之日
躬祭地祇於北郊

二月癸亥出元豐庫緡錢四百萬下河東陝西路糴邊儲
戊辰詔元祐章疏止編排宰執侍從臺諫及帥臣監司文字
餘更不編排 壬申罷富弼配享神宗廟庭 癸未詔封濮
王諸子爲王 詔每三歲遣郎官或御史出按監司職事
丁亥夏人寇義合寨

三月癸巳又寇塞門寨 戊戌詔熙河路乘機進築汝遮城
戊申詔同華解耀河中陝府六州官權鹽 丁巳幸申王

端王府

四月辛酉復罷宣徽使 丙子詔自今景靈宮四孟朝獻分

兩日

六月乙酉以瑞聖園爲北郊齋宮 夏人犯順軍寨

七月己亥詔知渭州呂大忠在元祐中堅持邊議不爲黨人所回進寶文閣直學士改知秦州大忠奏乞追寢已除職名量移弟大防陝西州郡不聽始大忠自涇原入對上詔大忠曰大防樸爲人所賣二三年可復相見章惇聞上語恐元祐人復用明年大防等再貶

八月庚辰范祖禹劉安世坐先論禁中覓乳母事並散官安置祖禹賀州安世英州

九月己亥阿里骨卒子瞎征襲位 癸巳詔河東路相度修

築葭蘆寨 辛亥夏人犯延安至大里河 乙卯廢皇后孟

氏初后母燕氏與尼法端供奉官王堅以左道爲后禱祠及造雷公式等物事聞上命入內侍押班梁從政等即皇城司鞠之獄成命侍御史董敦逸錄問敦逸始疑之內侍郝隨以